

Schwybogen Kniendschiessen

Gschetzti Damä und Herrä, s Wort mecht ich a eych wändä,
äs gilt hit nämlich ä Tradition z beändä.

Momänt mit Kämpf, Duell und Verleyrär-Leid,
Respäkt, Ehrgeyz, Leydäschaft und ganz viu Freid.

Zeytä mid Kamerad, Fründ und Konkuränt,
mit Unku, Vater und wer mä suscht nu kännt.

Ä fixä Tag wo i eysärä Agända stad,
jetzt nach 40 Jahr eifach z Ändi gad.

Nu Mängä wird sich a dä Tag gärä gsinnä,
doch isch eych klar dä gits jetzt nimmä.
Miär mend eys verabschidä vo somänä scheenä Evänt,
äs hed nä doch so Mängä kännt.

40 Jahr immer wider Schitzä vo hiä und da,
und jedä hed seys persönlichä Erläbnis gha.
Jedä Schitz cha epis eignigs uber das Schiässä prichtä,
ja jedä hed vo hiä seyni eigätä Gschichtä.

Stanser Schitzä hend jährlich Grossäs vollbracht,
und hend ä sonä Tag zum Erläbnis gmacht.
Äs Training fürs Rütli sells ursprünglich sey,
doch hit nimmt sich mängä ohni Rütli-Absichtä frey.

Schwybogä-Kniendschiässä was für nä Gschicht,
mä chent druber verfassä mängä, seytigä Pricht.
Gschichtä uber Schitzä, Erfolg und Niederlagä,
uber Material, Preysä und Technikplagä.

Sid Afang ah ä eifach glungnä und erfolgrychä Tag,
Mid viu versteckter Arbät, ohni Frag.
Top organisiert, ohni grossi Tückä,
sofort geschlossä jedi Organisations-Lückä.

So hed jedä Schitz seys persönlichä Erläbnis gmacht,
und hed vileicht sogar ä Preys Hei bracht.
Jetzt eifach „Tschau“ sägä isch doch rächt schwär,
und doch hed mä beschlossä das äs so richtig wär.

40 Jahr isch doch jetzt gnuäg gsi meinid iär nid ai?
Jetzt diä scheen Zeyt beändä isch doch schlai.
Für jedä Häufer jetzt äs grossäs Dankäscheen,
mä sell sie lobä i heechstä Teen.

Sie hend grad so grossi Leistig bracht wiä alli Schitzä,
Eb jetzt z vorderst oder nid ganz adä Spitzä.
Jedä Einzel heds bruicht i derä ganzä Zeyt,
so das mä cha beruhigt sägä: Äs isch so weyt.

D SG Stans darf sich stolz erhebä,
dä Stand sell nu einisch für sie erbebä.
Än Applais nid zum vergässä, demmer ihrnä gäh,
sie sellid dä als Dank a Sie und a alli vorhärigä Generationä näh.